

講欲敦本原而已其弊至於徒誦章句以待辨問則不可以此恒為定規柳雲又與持平蔡忱論啓前事不允柳雲曰李陌事廢主朝位至三品恩亦隆矣燕山雖以失德見廢君臣之分已定則寧失於厚宜矣議立後時李陌云燕山得罪於宗廟續籍當絕推戴之時不死幸矣於臣子之情甚薄舉一事可觀其餘矣領事申用漑曰朝廷物論如此且臺諫伏闕累朔廢事必多勿以久遠為難而改正可也同知事尹金孫侍講官李紆檢討官柳庸謹亦啓之上不答○臺諫合司再啓前事李陌如啓餘不允○御書講李紆曰前年凶歉與乙巳年無異老稚轉死于丘壑丐糧絡繹於道路而前日迎訪時大臣邈然無一語及於救濟推之於從事官臣竊慨焉上曰流移失所者黃海道尤甚故欲聞賑救之策而迎訪之時大臣皆云曾已收議別無遺策予不知其所以食不甘味焉○遣校理柳墩于平安道趙光祖于黃海道問民疾苦○御夕講○夜南方有氣如火○乙亥御朝講○臺諫合司五啓前事且曰右叅贊洪淑望輕人也不可冒居重地請遙皆不允○御書講○傳曰今後兒獐兒鹿雉卯等物勿令封進○政院啓曰黃海道平山地惡虎橫行於里間被傷者四十餘人捕捉何如傳曰如啓○以安彭壽